



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLIII. ad annum DLXXVII.

Parisiis, 1644

Vita, Epistola Et Decreta Benedicti Papae I.

urn:nbn:de:hbz:466:1-15324

LXXXIII.

* scripturas audit,

Si quis intrat ecclesiam Dei, & sacras * scripturas non audit, & pro luxuria sua auertit se a communione sacramenti, & in obseruandis mysteriis declinat constitutam regulam disciplinæ, istum talem proiciendum de ecclesia catholica esse decernimus, donec pœnitentiam agat, & ostendat fructum pœnitentiæ suæ; vt possit * communione percepta indulgentia promereri.

De consecr. dist. 2. Si quis intrat, ex Concil. Antioch. Can. 2.

* communione percepta indulgentiâ promereri.

Græce est, & ἡ ἀποστολή τοῦ ἐκείνου ἐκείνου.

LXXXIV.

Non liceat communicare excommunicatis, neque in domos eorum introire, neque orare cum eis; neque liceat, vt in alia ecclesia se regentur. Si autem aliquis episcopus aut presbyter aut diaconus, aut quilibet ecclesiasticus excommunicato communicauerit, quasi perturbans omnem disciplinam ecclesiasticam, excommunicetur.

VITA,

ANNO CHRISTI 573.

EPISTOLA ET DECRETA
BENEDICTI PAPÆ I.*Ex libro pontificali.*

BENEDICTVS natione Romanus ex patre Bonifacio, ^b sedit annos quatuor, mensem vnum, dies viginti octo. ^c Eiusdem tempore gens Longobardorum inuasit totam Italiam, simulque & fames nimia, vt etiam multitudo castrorum se traderet Longobardis, vt temperare posset inopiam famis. Quod dum cognouisset Iustinus piissimus imperator, quia Roma periclitaretur fame & mortalitate, misit in Ægyptum, & oneravit naues frumento, & transmisit Romam. Et sic misertus est Deus Italiae. In istis laboribus & afflictionibus positus sanctissimus Benedictus papa mortuus est. Qui sepultus est in basilica beati

Ssss iij

Petri apostoli in secretario, pridie Kalendas Augusti. Hic fecit ordinationem vnam per mensem Decembrem, presbyteros quindecim, diacones tres, episcopos per diuersa loca numero viginti vnum. Et cessauit episcopatus menses tres, dies decem.

NOTÆ.

Benedictus
papa factus
quando.
Longobar-
dorum per-
secutio.

^a *Benedictus.*] Cum Romana sedes ob tumultus bellicos vacasset menses decem & tres dies, Benedictus, quem Græci Bonosum nominant, creatus est pontifex decimo sexto Maii, anno Christi redemptoris 573. Huius tempore Longobardi maxima ex parte idolorum cultores, ecclesiam dira persecutione vexarunt, loca sacra effossis sanctorum martyrum sepulcris profanarunt, ædificia in suburbis Romæ diruerunt, sanctum Cerbonium episcopum cum suis clericis in exilium fugarunt, octoginta rusticos, quorum quadraginta immolantias carnes comedere, alii caput capræ adorare recusabant, supplicio mortis affecerunt. Hac persecutione ea miracula contigerunt, quæ in libris dialogorum recensentur apud eundem Gregorium de sancto Cerbonio episcopo, Santulo, aliisque presbyteris.

Iustini im-
peratoris
res gestæ.

Iustinus imperator Anastasium Antiochenum, ob quædam crimina illi obiecta depositum, relegauit. Qua re cum magnam apud Deum offensam merito incurrisset, omnia illi deinceps in peius ruere cœperunt. Persæ magna strage exercitum eius prostrauerunt. Cuius rei nuntium dum ad ipsum imperatorem perlatum esset, mente abalienatus fuit, dilucidis interdum interuallis ad modicum dumtaxat temporis spatium resipiscens. Ab hoc malo corporis liberatus est, quando ad conciliandum sibi diuinum numen templum extruxit Dei genitrici Mariæ, quæ ei tantum sanctitatis præstitit, vt dilucido interuallo potitus, cunctis recte dispositis, statum reipublicæ in tuto collocaret. Ex miscell. hist.

Benedictus
quamdiu
federit.

^b *Sedit annos tres.*] Annis quatuor, mense vno & viginti octo diebus sedem pontificiam tenuit. Obiit enim anno redemptoris nostri 577. pridie Kalendas Augusti.

^c *Eiusdem temporis gens Longobardorum.*] Quo tempore Longobardi in Italiam venerint, supra dixi in notis ad vitam Ioannis. Hæc Anastasii fortasse intelligenda sunt de eorundem grassatione illa, quam sanctus Gregorius inter sæuas ecclesiæ persecutiones annumerat.

EPISTOLA
BENEDICTI PAPÆ I.
AD DAVID EPISCOPVM.

Probat ex sacris literis, summam Trinitatem
vnitatem esse.

*Reuerendissimo fratri episcopo David, Benedictus salutem
in Domino.*

RESPONDERE literis vestris plenius cogitavi: sed cum hoc meditarer, tantus me dolor tetigit, vt magis flere quam aliquid dicere, delectatus sim. Sed ne funditus remaneret, pauca vobis rescribere curavi, ad potiora vos tempora congrue inuitans. Quod autem literæ tuæ testes sunt, quosdam intra prouinciam Baticam esse, qui dicerent, neminem veraciter posse probare, Trinitatem vnitatem fieri, cum neque tres vnum, neque vnum in tribus posse quemquam proprie approbare: quas ob causas, dilectissime fili, consulta tibi apostolicæ sedis misimus, vt aut his eos ad rectam fidem conuerti facias, aut ab ecclesia, antequam pestis hæc latius diuulgetur, repellas. His (frater) scripturarum testimoniis vnitatem Trinitatis agnosce, & desine Arianorum prauitatem sequi, vt ab eadem possis peccatorum indulgentiam promereri, Isaia propheta dicente: *Vidi Dominum sabaoth sedentem super* Isa. 6. *thronum excelsum, & seraphim stabant in circuitu eius: sex alæ uni, & sex alæ alteri. Duabus velabant faciem eius, duabus autem velabant pedes eius, & duabus volabant. Et clamabant ad alterutrum, dicentes: Sanctus, sanctus, sanctus, Dominus Deus sabaoth.* Si Trinitas non est, quare tertio, sanctus, dixerunt? Et si vnitas non est, quare sub trina repetitione vnum Deum ac Dominum intimarunt? Si Trinitas non est, cur in Geneseos dicitur: *Dixit Deus, fecit* Genes. 1. *Deus, & benedixit Deus?* Si vero vnitas non est, quare tertio dixit, Deus, & non deos pluraliter commendauit? Et si Trinitas non est, quare in Exodo dictum est tertio: *Domine, Domine, Domine, miserator & misericors?* Exod. 34. Si vnitas non est, quare dum tertio diceret, Domine, postea miserator sin-

gulariter dixit, & non, miseratores, vt plures ostenderet, intimauit? Si Trinitas non est, cur Abraham ad ilicem Mambre sedens, tribusque occurrens, vni, *Domine*, dixit; & non (vt viderat) tribus salutationis obsequium reddidit? Si vnitas non est, quare cum Mofi, *Deus Abraham*, & *Deus Isaac*, & *Deus Iacob*, tertio diceret, vnitatem ostendens, *Hoc mihi nomen est*, dixit; & non, Hæc sunt nostra nomina, designauit? Si Trinitas non est, quare Dauid tertio dixit: *Benedicat nos Deus, Deus noster, benedicat nos Deus*? Si vnitas non est, quare cum, *Deus*, tertio nominasset, *benedicat*, & non, benedicant, adiunxit? Si Trinitas non est, cur Isaias denuo dixit: *Domine Deus sabaoth, Deus Israel, qui sedes super cherubim*? Si vnitas non est, quare: *qui sedes*, dixit, & non, *qui sedetis*, * & adiunxit? Si Trinitas non est, quare in Regnorum libro dicitur: *Domine Deus omnipotens, Deus Israel, sermones tui fideles sunt*? Si vnitas non est, quare *tui* dicitur, & non, *vestri*, potius intimatur? Si Trinitas non est, cur in psalmo 58. cantatur: *Domine Deus virtutum, Deus Israel, intende ad visitandas omnes gentes*? Si vnitas non est, quare *intende* posuit, & non, *intendite*, vt prædicatus est, intimauit? Si Trinitas non est, quare in Apocalypsi tertio dixit: *Sanctus, sanctus, sanctus, Dominus Deus omnipotens, qui est, & qui erat*? Si vnitas non est, quare non, qui sunt, pluraliter, sed, *qui erat*, designauit? Si Trinitas non est, quare in Deuteronomio dictum est: *Dominus Deus tuus, Deus misericors est, & audiet vocem tuam*? Si vnitas non est, quare *audiet* posuit, & non, *audient*, intimauit? Si Trinitas non est, quare in Iesu Naue dicitur libro: *Dominus Deus deorum est*? Si vnitas non est, quare, *est*, dixit, & non, sunt, more locutionis induxit? Si Trinitas non est, quare Elias orando, *Domine, Domine, Domine, Deus Israel, ostende quia tu es Deus meus*, dixit? Si vnitas non est, quare, *ostende*, & non, *ostendite*, posuit? Si Trinitas non est, cur Mardocheus orando, *Domine, Domine Deus omnipotens, omnia in potestate tua sunt*, dixit? Si vnitas non est, quare *in tua* posuit, & non, *in vestra*, signauit? Si Trinitas non est, cur etiam Iudith orando dixit: *Domine Deus omnium virtutum, respice in orationem meam*? Si vnitas non est, quare, *respice*, posuit, & non, *respicite*, designauit? Si Trinitas non est, quare in Ieremia dicitur,

Dominus

* adstru-
xit ?

Dominus Deus vester Deus verax est? Si vnitas non est, quare, *verax est*, dixit, & non, *veraces*, potius intimauit? Si Trinitas non est, quare in Apocalypsi scriptum est: *Dominus Deus & spiritus prophetarum misit angelum suum*, ostendere seruis suis quæ oportet fieri cito? Si vnitas non est, quare cum Patrem & Filium & Spiritum nominasset, *misit Dominus*, dixit, & non, *miserunt*, sub prætextu trium personarum & nominum introduxit? Si Trinitas non est, quare in Deuteronomio dicitur: *Dominus Deus vester hic est Deus?* Si vnitas non est, quare, *Hic est*, dixit, & non, hi sunt, plurali numero designauit? Si Trinitas non est, quare in eodem dicitur libro: *Dominus Deus tuus Deus magnus & potens est?* Si vnitas non est, quare, *magnus & potens*, & non pluraliter nominatur? Si Trinitas non est, cur Tobias filium suum cum in Rages ciuitatem cum Raphaelæ angelo mitteret, benedicens eos, ita dixisse docetur: *Deus Abraham, & Deus Isaac, & Deus Iacob, ipse impleat benedictionem suam in vobis?* Si vnitas non est, quare, *ipse impleat*, dixit, & non ipsi impleant, intimauit? Postremo, si Trinitas non est, quare Dominus discipulos suos in nomine Patris & Filii & Spiritus sancti vniuersas gentes misit baptizare? Si vnitas non est, quare, *in nomine*, dixit, & non, in nominibus, præcipiendo perdocuit? Si Trinitas non est, quare apostolus Paulus ait: *Ex ipso, & per ipsum, & in ipso sunt omnia?* Si vnitas non est, quare, *ex ipso*, posuit, & non, ex ipsis, adstruxit? Si enim certo certius volueris vnitatem Trinitatis agnoscere, a sæpe dicto doctore gentium Apostolo poteris vniuersa condiscere, & sequi catholicam fidem, & Arianorum prauitatem respuere. *Gratia Domini nostri Jesu Christi, inquit, & caritas Dei, & communicatio sancti Spiritus. Ipsa est Patris, & Filii, & Spiritus sancti. Quomodo autem in Trinitate vnum sunt? quia natura atque ab inuicem separari non possunt. Ceterum, frater carissime, quæ tua continebant scripta, ex subiectis sententiis maxime omnia poteris colligere. Necessè est, frater carissime, adesse diuinum, vbi humanum cessat auxilium. Et vt iuxta apostolum Paulum dicamus, licet verba replicemus, quæ ipse Timotheo scribit dicens: *Ecclesia Dei viui, columna & firmamentum est veritatis. Et manifeste ma-**

gnum est pietatis sacramentum, quod manifestatum est in carne,
 iustificatum est in spiritu, apparuit angelis, prædicatum est in
 gentibus, creditum est in mundo, assumptum est in gloria. Spiritus
 autem manifeste dicit, quia in nouissimis temporibus discedent qui-
 dam a fide, attendentes spiritibus erroris & doctrinis dæmonio-
 rum in hypocrisis loquentium mendacium, & cauteriatam habentium
 suam conscientiam, prohibentium nubere, abstinere a cibis
 quos Deus creauit ad percipiendum cum gratiarum actione, fide-
 libus, & his qui cognouerunt veritatem, quia omnis creatura
 Dei bona est, & nihil reiiciendum, quod cum gratiarum actione
 percipitur. Sanctificatur enim per verbum Dei & orationem. Hæc
 proponens fratribus, bonus eris minister Christi Jesu, enutritus ver-
 bo fidei & bonæ doctrinæ, quam assecutus es. Ineptas autem &
 inanes fabulas deuota, & exerce teipsum ad pietatem. Nam cor-
 poralis exercitatio ad modicum utilis est. Pietas autem ad omnia
 utilis est, promissionem habens vitæ quæ nunc est, & futuræ.
 Fidelis sermo & omni acceptione dignus. In hoc enim laboramus
 & maledicimur, quia speramus in Deum viuum, qui est salua-
 tor omnium hominum, maximeque fidelium. Præcipe hæc & do-
 ce. Nemo adolescentiam tuam contemnat, sed exemplum esto fide-
 lium in verbo, in conuersatione, in caritate, in fide, in castitate.
 Dum venio, attende lectioni, exhortationi, doctrinæ. Noli ne-
 gligere gratiam quæ in te est, quæ data est tibi per prophetiam cum
 impositione manuum presbyterii. Hæc meditare, in his esto, ut
 profectus tuus manifestus sit omnibus. Attende tibi & doctrinæ,
 insta in illis. Hoc enim faciens, & teipsum saluum facies, & eos
 qui te audiunt. Fame enim nimis affligitur populus Roma-
 nus, qua clade atque aliis anxietatibus vexatus, longam
 epistolam minime scribere valui. Tempore congruo de-
 nuo (si necesse fuerit) mitte, & ea quæ desideraueris, su-
 me. Deuste incolumem custodiat, frater carissime. Amen.
 Data quarto Nonas Aprilis, Iustino & Libio viris clarissi-
 mis consulibus.